

十誦律卷第六十三

榮三

姚秦三藏弗若多羅共三藏鳩摩羅什譯

善誦第十誦之三

諸比丘自相語言共作賊去來答言隨意是比丘發去中道心悔生慙愧我等云何於善

第三

佛法中以信出家而作賊耶作是念已便不復去心疑我等將無得波羅夷耶是事白佛佛言不得波羅夷得偷蘭遮諸比丘自相語言共作賊去來答言隨意發去時中道一人心悔生慙愧我云何於善佛法中以信出家

而作賊耶復作是念若我不去餘人或當殺我當共去我不用物不取分作是思惟已逐去逐去已是中不奪他物亦不取分是比丘生疑我將無得波羅夷耶是事白佛佛言不犯波羅夷得偷蘭遮又復諸比丘自相語言共作賊去來答言隨汝等意發去去到家家都無所得是諸比丘生疑我將無得波羅夷耶是事白佛佛言不得波羅夷得偷蘭遮諸比丘自相語言共作賊去來答言隨汝意發去是中半比丘邏道半比丘取物邏道者言我

等不取他物無罪也後生疑我等作如是事將無得波羅夷耶是事白佛佛言不得波羅夷得偷蘭遮諸比丘自相語言共作賊去來答言隨意發去已半得物半不得物不得物者言我不得他物不取分無罪也又復生疑我等將無得波羅夷是事白佛佛言不得波羅夷得偷蘭遮又復諸比丘自相語言共作賊去來答言隨意相語言常少少取莫令具足取已合衆人物欲分物滿五錢諸比丘生疑我等將無得波羅夷耶以是事白佛佛言

隨人取物離本處計直守邏人與比丘衣比丘不取作是念是中誰是檀越誰是主是事白佛佛言但隨施者受有賊捉弟子將去和尚還奪取和尚疑我將無得波羅夷耶以是事白佛佛言若決定屬賊得波羅夷若未決定無罪阿闍黎近行弟子亦如是又賊捉一比丘將去還自奪身走來生疑我將無得波羅夷耶以是事白佛佛言自偷盜身無罪比丘持可稅物行到關門作是念我若持是物過得波羅夷又作是念是稅直我寧持與若

第三

佛法僧若和尚阿闍黎若父母如是思惟已
爲守關人共輒語語言我持是物供養若佛
法僧若和尚阿闍黎若父母因是物與他若
作信若自供所須如是等口輒語力得過無
咎飛過無罪比丘從餘比丘偕獨坐牀已作
是念我後不復還主求索言長老還我牀作
是言不與汝尋生疑悔心我將無得波羅夷
耶是事白佛佛言不得波羅夷得偷蘭遮比
丘從他借經卷已作是念我不復還主來索
言長老還我經來作是言不與汝尋生疑悔

心我將無得波羅夷耶是事白佛佛言不得
波羅夷得偷蘭遮有比丘偷弊衣囊囊中有
大價衣見已生念我將無得波羅夷耶是事
白佛佛言計囊價直五錢得波羅夷若不直
得偷蘭遮諸賊持酒至阿蘭若處飲半藏半
諸比丘遊行林中見有酒語弟子持到佳處三
用作苦酒弟子隨教持歸賊還求酒不得賊
到諸比丘所問言長老彼處酒汝持來不比
丘言持來賊瞋言汝是賊賊比丘言何故賊
賊賊言我是賊汝復偷我故言賊賊是比丘

生疑我將無得波羅夷耶是事白佛佛知故問汝以何心取比丘言世尊我謂是酒無主故取佛言無罪從今日若見物應好思量已取諸賊持肉到山林中食半藏半諸比丘遊行林中見肉語諸弟子持到舍以供明日弟子隨教持歸賊還求肉不得到比丘所問言長老彼處肉汝持來不比丘言我持來賊瞋言汝是賊賊比丘言何以故賊賊言我是賊汝復偷我故言賊賊是比丘生疑我將無得波羅夷耶是事白佛佛知故問汝以何心

取比丘言世尊我謂是肉無主故取佛言無罪從今日見物應好思量已取諸賊破城邑聚落若持錢物上至阿蘭若處後官力來圍遶是處是賊怖畏急故持物施諸比丘施已便出去諸白衣來見物在比丘所語言長老此是我物今在汝手比丘言賊布施我諸白衣言誰信汝語汝或自作賊或從賊得諸比丘不知云何是事白佛佛言莫從賊取物若賊主與當取取已便染壞色著若壞色已主故索者當還有居士脫衣著道邊便利有納

衣比丘見四向顧視不見人便取持去居士
言比丘莫持我衣去比丘不聞故去不止居
士走逐奪取語言比丘法應不與強取耶比
丘答言我謂是衣無所屬居士言是我衣非
無所屬比丘言若是汝持去是比丘生疑我
將無得波羅夷耶是事白佛佛知故問汝以
何心取比丘言我謂無所屬故取佛言無罪
從今日見物應好思量已取物實有所屬似
無所屬諸人有親里死棄著死人處是國土
人法好淨潔脫衣著死人處外然後入燒屍

納衣比丘見是衣四顧不見人便持去白衣
見已語比丘言莫持我衣去比丘不聞其言
故去不止白衣走逐捉奪取衣語言比丘法
應不與取耶比丘答言我謂是衣無所屬白
衣言是我衣非無所屬比丘言若是持去是
比丘生疑我將無得波羅夷耶是事白佛佛
知故問汝以何心取比丘言我謂無所屬故
取佛言無罪從今日若取物應好思量已取
有物實有所屬似無所屬浣衣人持諸衣浸
著水中忘去到餘聚落還憶念言我不失是

衣耶爾時納衣比丘求弊納衣故到是處見
是衣四顧不見人便持去浣衣人來見比丘
持去語言莫持我衣去比丘不聞故去不止
浣衣人走逐捉奪取語言比丘之法應不與
取耶比丘答言我謂是衣無所屬浣衣人言
是我衣非無所屬比丘言若是持去是比丘
生疑我將無得波羅夷耶是事白佛佛知故
問汝以何心取比丘言我謂是無所屬故取
佛言無罪從今日若見物應好思量已取有
物實有所屬似無所屬復有浣衣人持衣至

水邊浣衣已絞挾曬已一處坐看有納衣比
丘求弊納衣是處見衣四顧不見人便持去
浣衣人來見比丘持衣去語比丘言莫持我
衣去比丘不聞故去不止浣衣人走逐捉奪
取語言比丘之法應不與取耶比丘答言我
謂是衣無所屬浣衣人言是我衣非無所屬
比丘言若是汝衣持去是比丘生疑我將無
得波羅夷耶是事白佛佛知故問汝以何心
取比丘言我謂無所屬故取佛言無罪從今
日若見物應好思量已取有物實有所屬似

無所屬有一小兒持舍勒終日在道中戲忘
舍勒歸去納衣比丘求弊納衣到是處見已
四顧不見人便持去小兒舍勒有女人出見語
比丘言莫持我舍勒去比丘言我道中得女
人言我小兒持舍勒終日道中戲忘持歸汝
莫持去比丘言若是汝許便持去比丘生疑
我將無得波羅夷耶是事白佛佛知故問汝
以何心取比丘言我謂是無所屬故取佛言
無罪從今日若見衣好思量已取諸納衣比
丘著不淨汙納衣諸天神金剛神不喜亦失

威德是事白佛佛言不淨汙衣不應著著
得突吉羅有一居士聞諸釋子比丘能著納
衣持大價氎裹八枚錢著糞壤中令縷現遠
處立看有一納衣比丘求弊納衣故到是處見
縷已便取取已見是大價氎便持去居士喚
言長老是我氎汝莫擔去比丘言我自糞壤
中得何預汝事居士言我聞釋子比丘能著
弊納衣欲試故持大價氎裹八枚錢是氎中
有八枚錢若不信我可數看數看已實有八
枚錢比丘言若是汝許便持去比丘生疑我

將無得波羅夷耶是事白佛佛知故問汝以何心取比丘言我謂無所屬故取佛言無罪從今日若見物應好思量已取有一納衣比丘藏納衣著一處入舍衛城乞食更有納衣比丘求弊納故到是衣邊見已四顧不見人便持去以水浣之祇洹門邊曬衣主比丘乞食還久求不得欲入祇洹見在門邊語取衣比丘言長老汝得波羅夷耶取衣比丘言何以故衣主言我納衣汝輒持來取衣比丘生疑我將無得波羅夷取是事白佛佛知故問

汝以何心取比丘言我謂無所屬故取佛言無罪從今日若見物應好思量已取藏物異無所屬物亦異憍薩羅國近死人處有諸天祠舍守祠舍人浣衣絞捩曬已不收斂風吹墮死人處有一比丘死人處住觀死屍見是衣四顧不見人便持去守祠人見語言長老莫奪我衣去比丘言我死人處得何預汝事守祠人言是我衣我浣絞捩曬有小因緣不時收斂風吹墮死人處比丘言若是汝衣便持去比丘生疑我將無得波羅夷耶是事白

律三

七

佛佛知故問汝以何心取比丘言我謂無所屬故取佛言無罪從今日若見物應好思量已取諸比丘取屬死人處中衣諸旃陀羅言長老莫取我是中輪稅物諸比丘不知云何是事白佛佛言從今日有屬死人處衣比丘不應取若取得罪爾時於屬死人處外邊斂取小段弊納諸旃陀羅亦不聽取是事白佛佛言是中若遮莫取若取得突吉羅有一居士請佛及僧明日食佛默然受居士知佛受已頭面禮佛足右遶已去到自舍是夜辦多

美飲食辦食已晨朝敷坐處時到遣使詣佛所白佛言世尊食具已辦唯聖知時佛及衆僧入居士舍長老耶舍守僧坊請食分給孤獨居士二小兒到祇洹僧切中庭遊戲諸賊欲侵惱劫奪耶舍比丘見已作是念此兒可愍無所知故當爲是賊傷害劫奪即入禪定以神通力起四種兵諸賊見已心大怖畏謂是官力若聚落力所見圍遶我或當了如是思惟便疾遠去諸比丘來語耶舍言汝得波羅夷耶舍言何以故諸比丘言賊侵惱奪是

三物汝便爲奪取故耶舍生疑是事白佛佛
知故問汝云何奪取耶舍言我現神通力佛
言現神通力取無罪有一居士請佛及僧明
日食佛默然受居士知佛默然受已頭面禮
佛足右遶已去到自舍是夜辦具多美飲食
辦已晨朝敷坐處時到遣使詣佛所白佛言
卷三
世尊食具已辦唯聖知時佛及衆僧入居士
舍一比丘守僧坊請食分新誦呪術給孤獨
居士二小兒到祇洹遊戲諸賊欲侵惱劫奪
比丘見已念言是兒可愍無所知故爲賊所

傷害劫奪我新誦呪術可試誦救是小兒有
驗以不即誦呪術有四種兵出諸賊見已心
大怖畏念言是或官力若聚落力圍遶我我
或當了如是思惟已便疾走去諸比丘來語
守僧坊比丘言長老汝得波羅夷守僧坊比
丘言何以故諸比丘言人欲侵惱奪是兒物
汝便奪取故是比丘生疑我將無得波羅夷
耶是事白佛佛知故問汝以何心取比丘言
我試誦新呪術救是小兒故出四種兵取佛
言若誦新呪術取無罪舊比丘到餘聚落衆

僧分衣是比丘有善知識爲是比丘取衣分
是比丘從聚落還善知識比丘語比丘言長
老爲汝取衣分是比丘言何以取善知識比
丘生疑我將無得波羅夷耶是事白佛佛言
無罪從今日若比丘不語不應爲他取衣分
若取得突吉羅舊比丘到餘聚落衆僧分衣
是比丘有二共行弟子是二弟子不相知故
各爲和尚取衣分後二弟子自相語言汝亦
取衣分我亦取衣分誰具足得波羅夷耶心
生疑以是事白佛佛言不犯從今日應自相

語令一人取取時當言我與某甲比丘取衣
分有一比丘病衆僧分衣看病比丘爲取衣
分是病比丘死諸比丘不知云何是事白佛
佛言若先死後取衣分者應還歸本處若先
取衣分後死者應同死比丘餘物分有一居
士數數用衆僧田不與衆僧稅直是居士後
時欲種舊比丘來語居士言汝數數用衆僧
田而不與直汝今莫種若欲種者當與僧價
居士聞是語故強種時舊比丘却卧地遮塹
居士慚愧即休不種是比丘生疑我將無得

波羅夷耶是事白佛佛言無罪從今日莫身
作可羞事有一比丘盜佛圖物生疑我將無
得波羅夷耶是事白佛佛言若有守護者應
計直若具足得波羅夷舊比丘令人種衆僧
田是衆僧田近一居士田比丘亦令人種居
士田居士語比丘言莫種我田比丘言我自
種衆僧田何預汝事居士言是田我有非人
作證是國土諸田中以椶若死人脚骨頭骨
著土中爲識居士示其相比丘見已慚愧捨
犁牛去是比丘後還復遣人過相種居士後

見語比丘言我先與汝共諍時出地相已不
知耶今日云何復種是比丘即捨犁牛去心
生疑我將無得波羅夷耶是事白佛佛言應
計價直若具足得波羅夷不具足得偷蘭遮
有一比丘不與取華樹生疑我將無得波羅
夷耶是事白佛佛言應計是華樹價直若具
足得波羅夷果樹亦如是有一比丘破鵝巢
時鵝常來圍遶精舍空中悲鳴佛問阿難是
鵝何故大悲鳴耶阿難言有一比丘破其巢
是故悲鳴佛言從今日不應破鵝巢若破得

突吉羅復有比丘取鵲巢煮淲時鵲常來圍遶精舍空中悲鳴佛問阿難是鳥何故悲鳴阿難言一比丘取鵲巢煮淲是故悲鳴佛言從今日不應取鵲巢煮淲若取得突吉羅有居士蘿蔔園盛好一比丘詣居士所語言與我蘿蔔居士問言汝有價耶爲當直索比丘答言我無價居士言若人須蘿蔔者當持價來若我直與云何得活比丘言汝心定不與我耶居士言我定不與汝時比丘以呪術力呪令乾枯是比丘如是作已心生疑我將無

得波羅夷耶是事白佛佛言應計是蘿蔔直若具足得波羅夷若不具足得偷蘭遮菴園華園葉園果園亦應如是計價直有馬行食比丘以一束草示馬馬隨比丘去比丘指示餘草心念使食他草是比丘生疑我將無得波羅夷耶是事白佛佛言不得波羅夷得偷蘭遮諸比丘遊行憍薩羅國向舍衛城共賈客俱來是中有險道諸賈客乘好馬語諸比丘汝亦乘是好馬令疾過險道是中有比丘乘是好馬生心作是方便是馬可得身亦小

律三

十一

動尋生疑我將無得波羅夷耶是事白佛佛
言不得波羅夷得偷蘭遮有賈客乘滿船寶
比丘寄載渡河生心作如是方便是寶可得
身亦小動尋生疑我將無得波羅夷耶是事
白佛佛言不得波羅夷得偷蘭遮有一賈客
載滿船寶渡水船沒水中寶物沉下衣箱隨
流而去船主怖懼不得往取有比丘下流洗
見已取持去賈客見已語比丘言莫奪我衣
箱比丘言我自水中得何預汝事賈客言我
船沒水中沉失寶物衣箱隨流下我怖懼故

不得時取比丘言若是便持去是比丘生疑
我將無得波羅夷耶是事白佛佛言無罪有
一比丘持四方衆僧物移著餘坊心生疑我
將無得波羅夷耶是事白佛佛言不得波羅
夷得突吉羅諸賊牽牛上至阿蘭若處繫著
樹而去諸比丘食後經行林中見繞樹挽糾
比丘憐愍解放尋生疑我將無得波羅夷耶
是事白佛佛言不得波羅夷得突吉羅
舍衛國有一天神像能與人願有一居士從
求所願得隨意願歡喜故以白氎裹天像身

是中有比丘名黑阿難有大力不畏神像奪
神毘持去後生疑我將無得波羅夷耶是事
白佛佛言不得波羅夷得偷蘭遮有天神像
能護人身有一居士從求所願得隨意願是
居士歡喜故以金髮繫頭上黑阿難大勇健
欲往奪金髮欲到神便怖之是比丘心驚毛
豎猶故不畏降伏此神奪金髮持去後生疑
我將無得波羅夷耶是事白佛佛言不得波
羅夷得偷蘭遮舍衛國有居士婦到阿耆羅
婆河邊浴是諸居士婦脫莊嚴具衣服著岸

第三

十二

上入水洗浴岸邊樹上有獼猴來下持珠瓔
珞還上樹去是居士婦自恣洗浴竟上岸著
衣求珠瓔珞久不得便捨去獼猴見去已還
持瓔珞著本處已還上樹比丘食後遊行樹
林中見是瓔珞識其主便持還居士婦居士
婦言比丘汝是賊偷我瓔珞心悔已方還我
比丘言我不爾居士婦言汝云何得是比丘
以是事具說比丘心生疑我將無得波羅夷
耶是事白佛佛言無罪經行道頭窟上康郎
鳥在上作巢常持骨及弊納衣來棄著地經

行比丘便壞是巢是鳥常來圍遶精舍空中
悲鳴佛知故問阿難是鳥何故悲鳴阿難言
有一比丘壞巢是故悲鳴佛言從今日不應
壞是康郎鳥巢若壞得突吉羅諸比丘一處
有庫藏以飲食錢物著中鼠從穴中出偷錢
物弊衣飲食持入穴諸比丘疑誰偷是物去
時有一比丘著食置庫邊待時至當食鼠從
庫中出持食入穴比丘見知是鼠偷物是比
丘壞是穴亦得鼠物亦得自物盡自取諸比
丘言汝得波羅夷罪是比丘言何以故諸比

丘言汝取鼠物故是比丘生疑我將無得波
羅夷耶是事白佛佛言不得波羅夷從今日
當自取物鼠物不應取一比丘在房中卧夜
鼠持食來著牀下比丘早起澡手從淨人受
已便食諸比丘不大見是比丘乞食手足常
淨潔便問言長老不見汝乞食手足常淨耶
是比丘言諸長老有鼠夜持食來著我牀下
我早起澡手已從淨人受已食是故我常不
乞食手足淨潔諸比丘言長老汝得波羅夷
是比丘言何以故諸比丘言鼠不與汝自取

食故是比丘生疑我將無得波羅夷耶是事
白佛佛語諸比丘汝莫說是比丘事何以故
是鼠次前世是此比丘父愛念子故見便心
愛故常持食著牀下是比丘無罪有諸獵師
逐鹿走入僧坊是獵師來求鹿諸比丘不與
獵師久不得便還去諸比丘生疑我將無得
波羅夷耶是事白佛佛言無罪復有一獵師
以無毒箭射一鹿逐走入僧坊獵師來求比
丘不與久不得便還去比丘生疑我將無得
波羅夷耶是事白佛佛言無罪有一獵師以

毒箭射鹿鹿走入僧坊獵師來求比丘不與
獵師言是鹿被毒箭必當死比丘言死便死
不得與獵師久不得便去去未久鹿便死諸
比丘不知云何是事白佛佛言應還歸獵師
有諸獵師作鹿搯比丘以快心壞得偷蘭遮
以憐愍壞得突吉羅有捕鳥師張搯比丘以
快心壞得偷蘭遮憐愍心壞得突吉羅諸捕
鳥師張羅比丘快心壞得偷蘭遮憐愍心壞
得突吉羅有捕鳥師張細網比丘以快心壞
得偷蘭遮憐愍心壞得突吉羅捕鳥師有籠

鳥車比丘快心壞偷蘭遮憐愍心壞突吉羅
賣衣人買衣比丘見是衣便持去賣衣人言
莫持我衣去比丘言我持衣示彼已還歸汝
後生心欲不復還尋生疑我將無得波羅夷
耶是事白佛佛言不得波羅夷得偷蘭遮有
比丘使木師作不與木師價木師索直比丘
生心不與尋生疑悔我將無得波羅夷耶是
事白佛佛言不得波羅夷得偷蘭遮有一比
丘取陶師瓦器不與價陶師從索與我價比
丘生心不與尋生疑悔我將無得波羅夷是

事白佛佛言不得波羅夷得偷蘭遮比丘從
店肆買物不與價店肆賣物人從索價比丘
生心不與尋生疑悔我將無得波羅夷耶是
事白佛佛言不得波羅夷得偷蘭遮有病地
丘與諸看病比丘價言汝持是價作三新粥
我啜是粥亦與衆僧是看病諸比丘作是言
我何爲以是價作粥與衆僧我等但作少粥
與病人是錢我等當分取共作是等量已作
粥與病人錢便共分取是諸看病比丘即時
生疑我將無得波羅夷耶是事白佛佛言不

卷三

十五

得波羅夷得突吉羅有一比丘病思餅與諸
看病比丘價言汝持是作餅我自食亦與衆
僧諸看病比丘作是言我何爲以是價作餅
與衆僧我但作餅與病比丘是錢我等當自
分取共作是籌量已作餅與病人錢便共分
取是諸看病比丘即時生疑我將無得波羅
夷耶是事白佛佛言不得波羅夷得突吉羅
有一比丘病多有錢作是念我死後衆僧必
當分我錢我今當令僧不得分念已語看病
人言作糜沙豆羹與我來看病人作羹與以

小因緣故看病人出病人以錢著羹中合喫
是食難消故便死看病人持棄死人處諸鳥
來破腹出腸錢墮地時衆僧即打撻推呼看
病人來言見死比丘多有錢汝持來衆僧當
分諸看病比丘求錢不得有一冢間比丘到
死人處觀無常見是錢持來與衆僧即生疑
悔我將無得波羅夷耶是事白佛佛言無罪
有病比丘多有田地語諸看病人言喚諸比
丘來我處分此地與佛與衆僧若與人諸看
病人生念病比丘若以是地與佛與衆僧與

人我等無所得便不爲喚諸比丘病比丘死
諸看病比丘不知云何是事白佛佛言莫以
小因緣違逆病人語當隨病人處分皆爲作
有病比丘多水鉢多生活物病比丘語諸看
病比丘言喚諸比丘來我當處分是物與佛
與衆僧與人諸看病人生念是病比丘若以
是物與佛與衆僧與人我等無所得便不爲
喚諸比丘病比丘死諸看病比丘不知云何
是事白佛佛言莫以小因緣違逆病比丘語
當隨所處分皆爲作有東方比丘尼與波梨

比丘尼共道行波梨比丘尼在前東方比丘
尼在後波梨比丘尼失衣東方比丘尼得共
合一處時東方比丘尼唱言誰失此衣我地
得波梨比丘尼言汝取是衣耶答言我取衣
主言汝得波羅夷問言何以故答言汝以盜
心取是比丘尼心生疑我將無得波羅夷耶
是事白佛佛言無罪有施越比丘尼喜得供
養大得酥油蜜石蜜有一賈客見是比丘尼
心喜作是言善女汝若須酥油蜜石蜜隨意
恣舍取比丘尼言爾作是請時有餘比丘尼

聞過數日便往到賈客舍詐言施越比丘尼須五升油賈客言用作何物答言我持至比丘尼寺中賈客便與是比丘尼持至寺中便服過數日賈客見施越比丘尼語言善女汝何以但索油不索飯肉羹等比丘尼言汝何所道賈客言先有一比丘尼來云汝索五升油我便與施越言好若更索餘物亦與施越到彼比丘尼邊言汝是弊比丘尼惡比丘尼賊比丘尼汝得波羅夷是比丘尼言何以故施越言賈客不施汝汝誑他取油故答言非

不與取我以汝名字故取是比丘尼生疑我將無得波羅夷耶是事白佛佛知故問汝以何心取答言我以施越名字故取佛言不得波羅夷故妄語故得波逸提從今日不得詐稱他名字取若取得罪

十誦律卷第六十三

永樂北藏

十誦律

第七九冊

音釋

邏明佐切 曬所賣切 縷力主切 挽挽者
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也
也邏也 也曬也 也縷也 也挽也